

Na osnovu člana 12. Zakona o udruženjima i fondacijama Bosne i Hercegovine, ("Službeni glasnik BiH", broj: 32/01, 42/03, 63/08, 76/11 i 94/16), Osnivačka Skupština Udruženja Filantropski forum u Bosni i Hercegovini (skraćeno: Filantropski forum), održana u Sarajevu 02.11.2021. godine usvaja:

## **STATUT**

### **UDRUŽENJA FILANTROPSKI FORUM U BOSNI I HERCEGOVINI**

#### **Član 1.**

##### **(Predmet Statuta)**

(1) Ovim Statutom (u daljem tekstu: Statut), u skladu sa Zakonom o udruženjima i fondacijama BiH (u daljem tekstu: Zakon), bliže se uređuju organizacija, način rada i djelovanja udruženja Filantropski forum u Bosni i Hercegovini (u daljem tekstu: Filantropski forum), a što se odnosi na:

- a) naziv i sjedište Filantropskog foruma;
- b) ciljeve i djelatnosti Filantropskog foruma;
- c) organe Filantropskog foruma, način na koji se biraju, ovlaštenja koja imaju, kvorum i pravila glasanja, trajanje mandata, lice ovlašteno da sazove Skupštinu, uslovi i način raspuštanja, odnosno prestanak rada;
- d) postupak za primanje i isključivanje članova Filantropskog foruma;
- e) pravila za ostvarivanje, korištenje i raspolaganje sredstvima Filantropskog foruma, kao i organ koji je ovlašten za nadzor nad korištenjem tih sredstava;
- f) način podnošenja finansijskog izvještaja i izvještaja o radu;
- g) javnost rada;
- h) postupke za izmjenu i dopunu Statuta, kao i ovlaštenja i postupke donošenja ostalih općih akata.
- i) opis oblika i sadržaj pečata i znaka Filantropskog foruma;
- j) zastupanje Filantropskog foruma
- k) uslove i postupak za spajanje, podjelu odnosno prestanak rada uključujući i bilo kakav poseban kvorum ili pravila za postizanje kvalifikovane većine u postupku glasanja;
- l) postupak za raspolaganje preostalim imovinom ili drugim sredstvima u slučaju raspuštanja ili prestanka rada Filantropskog foruma.

## **Član 2.**

### **(Naziv)**

- (1) Puni naziv Udruženja je: **Udruženje Filantropski forum u Bosni i Hercegovini**  
**Удружење Филантропски форум у Босни и Херцеговини**  
**Udruga Filantropski forum u Bosni i Hercegovini.**

Skraćeni naziv Udruženja je: **Udruženje Filantropski forum**  
**Удружење Филантропски форум**  
**Udruga Filantropski forum**

- (2) Naziv Udruženja u prevodu na engleski jezik je: **Association Philanthropy Forum in Bosnia and Herzegovina.**
- (3) Sjedište Udruženja je u Sarajevu, Bosna i Hercegovina.
- (4) Adresa Udruženja je Bulevar Meše Selimovića br. 16.

## **Član 3.**

### **(Ciljevi i djelatnost Filantropskog foruma)**

- (1) Filantropski forum u Bosni i Hercegovini je udruženje, osnovano na neodređeno vrijeme radi ostvarivanja ciljeva u oblasti filantropije.
- (2) Filantropski forum svoju djelatnost ostvaruje na teritoriji Bosne i Hercegovine.
- (3) Filantropski forum razvija i promoviše filantropiju u Bosni i Hercegovini kroz međusektorsku saradnju učesnika/ica iz Bosne i Hercegovine, a u cilju stvaranja održive filantropske zajednice koja doprinosi stvaranju društvenih promjena, a posebno kroz ciljeve:
- a) unapređenje učinkovitosti i kapaciteta ključnih aktera u oblasti filantropije putem umrežavanja, razmjene znanja i informacija;
  - b) doprinos unapređenju i sazrijevanju okruženja pogodnog za razvoj filantropije;
  - c) pružanje podrške procesu poboljšanja slike o filantropiji u javnosti u Bosni i Hercegovini;
  - d) primjena i unapređenje standarda i dobre prakse transparentnosti i odgovornosti među svim članovima/icama Filantropskog foruma;
  - e) pružanje podrške razvoju i promociji mehanizma davanja, instrumenata za mjerenje rezultata i utjecaja dobrotvornih davanja;

- f) pružanje podrške razvoju ljudskih resursa i jačanju organizacionih kapaciteta u filantropskom sektoru kroz treninge, radionice, konferencije i druge aktivnosti;
- g) razvoj jake zajednice neprofitnih, korporativnih, institucionalnih i individualnih filantropa i filantropkinja u Bosni i Hercegovini;
- h) saradnja sa drugim udruženjima u zemlji i inostranstvu; i
- i) ostvarivanje saradnje i razmjena informacija sa istim ili sličnim udruženjima, organima i organizacijama, pravnim licima, institucijama u zemlji i inostranstvu u svrhu ostvarivanja ciljeva, Filantropskog foruma u skladu sa Zakonom.

#### **Član 4.**

##### **(Organi)**

- (1) Organi Filantropskog foruma su: Skupština, Upravni odbor i Izvršni direktor.
- (2) Članovi organa Filantropskog foruma su dužni svoje obaveze obavljati u skladu sa Statutom i Zakonom, a na način koji ne šteti Filantropskom forumu.
- (3) Skupština Filantropskog foruma može, radi efikasnijeg i racionalnijeg izvršavanja svojih poslova i zadataka, posebnom odlukom obrazovati komisije, odbore, stručne timove i sl.
- (4) Odbore ili komisije čine najmanje tri člana koje bira Skupština, a osnivaju se prema potrebama rada Filantropskog foruma.
- (5) Članovi odbora ili komisije na konstituirajućoj sjednici između sebe biraju Predsjednika odbora/komisije koji saziva sastanke odbora/komisija, a sastaju se po potrebi, i za svoj rad odgovorni su Skupštini.
- (6) Odlukom iz prethodnog stava utvrđuju se sastav, djelokrug, broj članova i način ostvarenja odgovornosti ovih radnih tijela.

#### **Član 5.**

##### **(Skupština)**

- (1) Skupština je najviši organ Filantropskog foruma.
- (2) Predsjednika/icu Skupštine biraju članovi/ice Skupštine s pravom glasa na mandat do 3 godine, sa mogućnošću reizbora.
- (3) Skupštinu čine svi punopravni članovi/ice Filantropskog foruma s pravom glasa, kao i pridruženi članovi/ice koji nemaju pravo glasa, ali mogu punopravnim članovima/cama davati prijedloge o svim pitanjima koja su u nadležnosti Skupštine Filantropskog foruma.
- (4) Punopravni/e članovi/ce su osnivači Filantropskog foruma koji imaju pravo glasa u Skupštini.

- (5) Pridruženi/a član/ica je član/ica Filantropskog foruma koji/a je uredno izmirio/la članarinu, te aktivno učestvuje u radu i aktivnostima Filantropskog foruma, a sve u skladu sa internim procedurama i pravilima koje će usvojiti Upravni odbor.
- (6) Punopravni/a član/ica ne može prenositi pravo glasa na drugog/u člana/icu, ali može opunomoćiti drugo lice za učešće i glasanje na Skupštini Filantropskog foruma, u slučaju opravdane spriječenosti.

## **Član 6.**

### **(Nadležnosti Skupštine)**

- (1) Skupština Filantropskog foruma je nadležna za:
  - a) usvajanje Statuta i njegovih izmjena i dopuna, kao i drugih akata određenih Statutom;
  - b) odlučivanje o spajanju, podjeli i prestanku rada, osnivanju drugih pravnih lica, kao i drugim statusnim promjenama Filantropskog foruma;
  - c) usvajanje plana i programa rada i izvještaja o radu koje je pripremio Upravni odbor;
  - d) imenovanje i razrješavanje predsjednika/ice i članova/ica Upravnog odbora;
  - e) formira odbore, komisije i druga radna tijela;
  - f) razmatranje i usvajanje finansijskog plana i izvještaja;
  - g) odlučivanje o prestanku rada Filantropskog foruma i raspodjeli imovine;
  - h) verifikacija prijema u članstvo i odlučivanje o žalbama na odluke Upravnog odbora o odbijanju prijema u članstvo;
  - i) odlučivanje o prestanku članstva u Filantropskom forumu;
  - j) odlučivanje o drugim pitanjima koja nisu u nadležnosti drugih organa Filantropskog foruma, u skladu s ovim Statutom i Zakonom.

## **Član 7.**

### **(Organizacija rada Skupštine)**

- (1) Redovna sjednica Skupštine se održava najmanje jednom godišnje radi usvajanja finansijskog izvještaja i izvještaja o radu za prethodnu godinu, i to najkasnije 15 (petnaest) dana prije isteka zakonom propisanog roka za registraciju i objavljivanje izvještaja.
- (2) Vanredna sjednica Skupštine se održava po potrebi i može se zakazati na obrazloženi prijedlog predsjednika Skupštine, Upravnog odbora, izvršnog direktora.
- (3) Sjednicu Skupštine Filantropskog foruma saziva predsjednik Skupštine pisanim pozivom koji sadrži mjesto i vrijeme održavanja Skupštine i prijedlog dnevnog rada. Uz poziv na sjednicu Skupštine dostavljaju se i nacrti akata koji će se razmatrati.

- (4) Dostava poziva sa materijalima za sjednicu Skupštine vrši se najkasnije 15 (petnaest) dana prije održavanja sjednice.
- (5) Vanredna sjednica Skupštine može biti izuzetno sazvana i u roku kraćem od roka iz stava (4) i to najkasnije 3 (tri) dana prije održavanja sjednice Skupštine, u slučaju kad postoji hitna potreba za njenim održavanjem.
- (6) Sjednicom Skupštine predsjedava predsjednik Skupštine.

## **Član 8.**

### **(Kvorum i odlučivanje)**

- (1) Kvorum za održavanje sjednice Skupštine je 50% + 1 od ukupnog broja punopravnih članova/ica s pravom glasa, što obavezno uključuje prisutnost Predsjednika Skupštine.
- (2) Skupština donosi odluke konsenzusom prisutnih punopravnih članova/ica s pravom glasa, kada postoji kvorum za odlučivanje, osim u slučajevima kada je Statutom utvrđena kvalifikovana većina za pojedine odluke.
- (3) Sjednice Skupštine se mogu održavati i u formi elektronske konferencije, na prijedlog predsjednika Skupštine, u skladu sa Poslovníkom o radu Skupštine.
- (4) U slučaju nepostojanja kvoruma za održavanje sjednice Skupštine, sjednica će se odgoditi za ne manje od 15 (petnaest) dana i ne duže od 30 (trideset) dana, a članovi Skupštine bit će obaviješteni o danu, mjestu i vremenu održavanja sjednice.

## **Član 9.**

### **(Prestanak članstva u Skupštini)**

- (1) Članstvo u Skupštini prestaje:
  - a) pisanom ostavkom
  - a) opozivom u slučaju kada se utvrdi da član/ica Skupštine ne izvršava svoje dužnosti utvrđene Zakonom i ovim Statutom, kao i u drugim slučajevima kada član Skupštine ne ispunjava uopšte ili u dovoljnoj mjeri poslove i zadatke u ostvarenju ciljeva i djelatnosti Filantropskog foruma; te
  - b) u slučaju smrti.
- (2) U slučaju prestanka članstva opozivom, punopravni članovi Skupštine odluku donose 2/3 većinom.

## **Član 10.**

### **(Upravni odbor)**

- (1) Upravni odbor sačinjava 5 članova/ica čiji mandat traje do 3 godine sa mogućnošću reizbora.
- (2) Predsjednika/icu i članove Upravnog odbora bira i razrješavaju punopravni/e članovi/ce Skupštine Filantropskog foruma na osnovu prijedloga kandidata svih članova/ica Filantropskog foruma.
- (3) Za članove Upravnog odbora biraju se lica s najvećim brojem glasova punopravnih članova/ica s pravom glasa, a u slučaju jednakog broja glasova, glasanje se ponavlja za kandidate koji imaju jednak broj glasova.
- (4) Za predsjednika/icu Upravnog odbora imenuje se lice koje ima najveći broj glasova, uz primjenu pravila iz stava (3) ovog člana.
- (5) Upravni odbor bira i razrješava zamjenika/icu predsjednika/ice Upravnog odbora, koji/a nema status zastupnika/ice u smislu zakona, a obavlja dužnosti predsjednika/ice Upravnog odbora u slučaju njegove spriječenosti ili propuštanja da vrši dužnosti utvrđene Statutom.
- (6) Članovi Upravnog odbora nemaju pravo na naknadu za rad u Upravnom odboru, izuzev troškova koji nastanu asocirano za rad Filantropskog foruma (avio karte, dnevnice u inostranstvu itd.)

## **Član 11.**

### **(Nadležnosti Upravnog odbora)**

- (1) Upravni odbor Filantropskog foruma je nadležan za:
  - a) pripremanje sjednice Skupštine
  - b) pripremanje i predlaganje nacрта Statuta i drugih akata koje donosi Skupština
  - c) provođenje politike, zaključaka i drugih odluka koje je donijela Skupština;
  - d) upravljanje imovinom Filantropskog foruma;
  - e) podnošenje Skupštini na usvajanje prijedloga godišnjeg ili periodičnog plana i programa rada i izvještaja o radu, kao i finansijskog plana i finansijskih izvještaja;
  - f) donošenje opštih akata Filantropskog foruma, izuzev Statuta, i njihove izmjene i dopune;
  - g) organiziranje i upravljanje radom Filantropskog foruma, uz izvršnog direktora, u skladu s ciljevima i djelatnostima Foruma, definisanih u skladu sa ovim Statutom.
  - h) razmatranje, usvajanje i nadziranje sprovođenja konkretnih programa/projekata kojima se ostvaruju ciljevi Filantropskog foruma;

- i) briga o javnosti rada;
- j) imenovanje i razrješavanje izvršnog/e direktora/ice, odlučivanje o uslovima za obavljanje te dužnosti, formi njegovog angažmana i drugim pitanjima koji se tiču obavljanja navedene dužnosti;
- k) odlučivanje po prijavama za prijem u članstvo u skladu sa Statutom;
- l) odlučivanje o uslovima plaćanja i visini članarine;
- m) utvrđivanje potreba i uslova angažovanja saradnika u realizaciji programa, projekata i aktivnosti Filantropskog foruma;
- n) donošenje akata kojima će se regulisati način, vrste, obim i angažman zaposlenika u skladu sa ovim Statutom i Zakonom.
- o) može donositi i druge opće akte (odluke, pravilnike i poslovnike) neophodne za redovno poslovanje Filantropskog foruma koji moraju biti u skladu sa Statutom i Zakonom, te koji nisu u isključivoj nadležnosti Skupštine.
- p) obavljanje drugih poslova određenih Statutom i Zakonom.

## **Član 12.**

### **(Organizacija rada Upravnog odbora)**

- (1) Sjednicama Upravnog odbora predsjedava predsjednik/ica Upravnog odbora.
- (2) Upravni odbor se mora sastati minimalno 4 (četiri) puta godišnje.
- (3) Sjednicu Upravnog odbora saziva predsjednik/ica Upravnog odbora i o tome obavještava sve članove Upravnog odbora.
- (4) Upravni odbor za svoj rad odgovara Skupštini Filantropskog foruma.

## **Član 13.**

### **(Kvorum i odlučivanje)**

- (1) Upravni odbor ima kvorum kada su prisutna najmanje 3 člana/ice Upravnog odbora, od kojih je jedan predsjednik/ica Upravnog odbora, a ostali su članovi/ice.
- (2) Svaki član/ica Upravnog odbora ima jedan glas.
- (3) Odluka Upravnog odbora je donesena ako postoji kvorum iz stava (1) ovog člana i ako je usvojena većinom glasova prisutnih članova/ica Upravnog odbora.

- (4) Sjednice Upravnog odbora se mogu održavati i u formi elektronske konferencije kao i korespondentnim putem, na prijedlog predsjednika Upravnog odbora, a u skladu sa Poslovníkom o radu Upravnog odbora.
- (5) Upravni odbor će na prvoj konstituirajućoj sjednici donijeti i Poslovník o radu Upravnog odbora kojim će se detaljno regulisati način rada Upravnog odbora.

#### **Član 14.**

##### **(Prestanak članstva u Upravnom odboru)**

- (1) Članstvo u Upravnom odboru prestaje:
  - b) istekom mandata;
  - c) pisanom ostavkom dostavljenom Upravnom odboru;
  - d) opozivom, odnosno Odlukom Skupštine u slučaju kada se utvrdi da Upravni odbor ne izvršava svoje dužnosti utvrđene Zakonom, ovim Statutom i smjernicama Skupštine Filantropskog foruma, kao i u drugim slučajevima kada član Upravnog odbora po ocjeni Skupštine ne ispunjava uopšte ili u dovoljnoj mjeri poslove i zadatke u ostvarenju ciljeva i djelatnosti Filantropskog foruma; te
  - e) u slučaju smrti.
- (2) Članovi Upravnog odbora obavezni su na pismeno izjašnjavanje o bilo kakvom sukobu interesa koje bi onemogućilo njihov rad u Upravnom odboru.

#### **Član 15.**

##### **(Izvršni/a direktor/ica)**

- (1) Izvršni/a direktor/ica Filantropskog foruma vrši funkciju zastupnika/ice Filantropskog foruma.
- (2) Izvršnog/u direktora/icu pri osnivanju Filantropskog foruma imenuje Skupština a nakon toga odluku o svim razrješenjima i imenovanjima izvršnog/e direktora/ice donosi Upravni odbor.
- (3) Mandat izvršnog/e direktora/ice traje 3 godine s mogućnošću reizbora.
- (4) Izvršni/a direktor/ica za svoj rad odgovara Upravnom odboru.



## Član 16.

### (Nadležnosti Izvršnog/e direktora/ice)

#### (1) Djelokrug izvršnog/e direktora/ice:

- a) zastupanje i predstavljanje Filantropskog foruma u skladu sa Zakonom, Statutom, drugim opštim aktima Filantropskog foruma i odgovoran/na je za zakonitost poslovanja Filantropskog foruma;
- b) aktivno promovisanje ciljeva i djelatnosti Filantropskog foruma kroz odnose s javnošću;
- c) staranje o zakonitosti rada Filantropskog foruma;
- d) provođenje mjera i odluka Upravnog odbora, smjernica Skupštine kojima se ostvaruju ciljevi i djelatnosti Filantropskog foruma;
- e) organizacija i vođenje poslova Filantropskog foruma saglasno odlukama Skupštine i Upravnog odbora;
- f) učestvovanje u strateškom planiranju i staranje o implementaciji strateškog plana Filantropskog foruma;
- g) razvijanje platforme djelovanja i zastupanja oko ključnih filantropskih pitanja identifikovanih od strane Filantropskog foruma;
- h) razvijanje godišnjeg budžeta koji uključuje članarine, prihode od događaja, obuka, donacija i dr. u skladu s uputstvima organa Filantropskog foruma;
- i) stvaranje uslova za povećanje sredstava i imovine Filantropskog foruma;
- j) pripremanje godišnjih izvještaja o aktivnostima Filantropskog foruma i dostavljanje istih Upravnom odboru na razmatranje i usvajanje;
- k) koordinacija i nadgledanje sprovođenja aktivnosti Filantropskog foruma, uključujući i sastanke, događaje, kampanje, inicijative i druge aktivnosti;
- l) razvijanje i sprovođenje plana komunikacije i odnosa s javnošću u cilju profilisanja Filantropskog foruma, njegovih članova/ica i filantropije;
- m) građenje i njegovanje imidža i simbola identiteta Filantropskog foruma, njegovih članova/ica i ukupnog stanja filantropije na pozitivan, afirmišući i proaktivan način;
- n) učestvovanje u nacionalnim, regionalnim i globalnim mrežama koje se bave pitanjima iz oblasti filantropije, kao predstavnik/ica Filantropskog foruma, po prethodnom odobrenju Upravnog odbora; i
- o) donosi odluku o prijemu uposlenika za rad u Filantropskom forumu i odgovoran je za sklapanje Ugovora o radu, a na osnovu akata koje donosi Upravni odbor, a kojima

će se regulisati način, vrste, obim i angažman zaposlenika u skladu sa ovim Statutom i zakonom.

p) obavlja druge poslove u skladu sa Statutom i Zakonom.

## **Član 17.**

### **(Prestanak mandata Izvršnog/e direktora/ice)**

- (1) Izvršnom/oj direktoru/ici mandat može prestati prije isteka mandatnog period iz Člana 15. stav (3) i to:
- a) ostavkom;
  - b) ako ne obavlja svoju dužnost u skladu sa Zakonom, Statutom i drugim opštim aktima Foruma
  - c) ako svojim ponašanjem ruši ugled Foruma;
  - d) u slučaju da je direktor izgubio povjerenje Upravnog odbora:
  - e) u drugim slučajevima predviđenim zakonom;
  - f) u slučaju smrti.
- (2) Odluku o razrješenju Izvršnog direktora donosi Upravni odbor uz prethodnu saglasnost punopravnih Skupštine, većinom glasova prisutnih članova/ica Upravnog odbora. Upravni odbor odluku o razrješenju sa dužnosti Izvršnog direktora dostavlja Skupštini Udruženja u roku od 8 dana od dana donošenja iste.

## **Član 18.**

### **(Postupak za primanje i isključivanje članova)**

- (1) Članstvo u Filantropskom forumu je dobrovoljno.
- (2) Osnivači Filantropskog foruma ujedno su i članovi Filantropskog foruma, koje svojstvo stiču danom osnivanja Filantropskog foruma.
- (3) Članom Filantropskog foruma može postati svako fizičko lice koje je državljanin Bosne i Hercegovine, koje prihvata Statut i ciljeve Filantropskog foruma i to potvrđuje potpisivanje pristupnice.
- (4) Članovi Filantropskog foruma mogu biti i pravna lica registrovana kod nadležnog organa u Bosni i Hercegovini, koji učestvuju u radu Filantropskog foruma preko svojih delegiranih predstavnika.

- (5) Članovi Filantropskog foruma su ravnopravni u ostvarivanju svojih prava.
- (6) Za stupanje u članstvo Filantropskog foruma podnosi se pristupnica na propisanom obrascu, a o prijemu u članstvo odlučuje Upravni odbor Filantropskog foruma, a na osnovu pravilnika koji donese Skupština.
- (7) Primljeni član se upisuje u evidenciju članstva.
- (8) Udruženje vodi spisak svojih članova, sukladno Zakonu.

## **Član 19.**

### **(Prekid članstva)**

- (1) Članstvo u Filantropskom forumu prestaje:
  - 1) dobrovoljnim istupanjem iz Filantropskog foruma;
  - 2) isključenjem člana;
  - 3) smrću člana, odnosno gubitkom pravnog subjektiviteta člana;
  - 4) neplaćanjem članarine na osnovu Odluke Skupštine, pod uslovima i na način definisan Pravilnikom o članstvu u Filantropskom forumu
  - 5) prestankom rada Filantropskog foruma.

## **Član 20.**

### **(Isključenje iz članstva)**

- (1) Svaki član Filantropskog foruma može dobrovoljno istupiti iz članstva, o čemu se obavještava Upravni odbor Filantropskog foruma, nakon čega se vrši evidentiranje istupanja.
- (2) Isključenje iz članstva se vrši kada član Filantropskog foruma teže povrijedi odredbe ovog Statuta ili djeluje protivno ciljevima i interesima Filantropskog foruma.
- (3) Odluku o isključenju donosi Upravni odbor.
- (4) Protiv odluke Upravnog odbora o isključenju, isključeni član ima pravo žalbe Skupštini u roku od 15 dana od dana prijema odluke.
- (5) Odluka Skupštine je konačna.
- (6) Isključenje iz Filantropskog foruma povlači sa sobom i opoziv tog člana u organima upravljanja, odnosno opoziv kao predstavnika Filantropskog foruma.

## **Član 21.**

### **(Sticanje i raspolaganje imovinom)**

- (1) Filantropski forum može stjecati prihode iz sljedećih izvora:
  - a) članarina;
  - b) dobrovoljnih priloga i poklona javnih institucija, fizičkih i pravnih lica, kako stranih tako i domaćih, u novcu, uslugama ili imovini bilo koje vrste;
  - d) državnih subvencija i ugovora s organima vlasti, javnim institucijama, fizičkim i pravnim licima, domaćim i međunarodnim organizacijama;
  - e) drugih izvora u skladu sa Zakonom i Statutom.
- (2) O sticanju prihoda, korištenju imovine i raspolaganju sredstvima Filantropskog foruma odlučuje Upravni odbor Filantropskog foruma, u skladu s ovim Statutom i općim aktima Filantropskog foruma.

## **Član 22.**

### **(Način podnošenja finansijskog izvještaja i izvještaja o radu)**

- (1) Filantropski forum je dužan uredno voditi poslovne knjige, sastavljati i podnositi finansijske izvještaje u skladu sa Zakonom.
- (2) Upravni odbor je dužan podnijeti izvještaj o radu i finansijski izvještaj Skupštini. Ukoliko Skupština ne usvoji iste, može opozvati Upravni odbor.
- (3) Kontrolu finansijskog poslovanja Filantropskog foruma vrši Skupština. Osoba koja je ovlaštena potpisivati akte koji se odnose na sticanje i raspolaganje imovinom Filantropskog foruma i finansijsko poslovanje jeste predsjednik/ica Upravnog odbora.
- (4) Filantropski forum za svoje obaveze odgovara svojom cjelokupnom imovinom.
- (5) Nad imovinom Filantropskog foruma može se provesti stečaj, u skladu sa Zakonom.
- (6) Članovi/ice Filantropskog foruma i Upravni odbor nadziru rad Filantropskog foruma. Ako se utvrde nepravilnosti u provođenju statuta Filantropskog foruma, član/ica Filantropskog foruma ili Upravni odbor dužan/na je na to upozoriti Skupštinu. Ako se upozorenje ne razmotri na sjednici Skupštine u roku od 30 dana od dana dostavljenog pismenog upozorenja i nepravilnosti ne otklone, može se podnijeti tužba nadležnom sudu, u skladu sa Zakonom.
- (7) Nad radom Filantropskog foruma Upravna inspekcija Ministarstva može provesti inspeksijski nadzor u slučajevima utvrđenim Članom 47. Zakona o udruženjima i Fondacijama BiH.

### **Član 23.**

#### **(Javnost rada)**

- (1) Rad Filantropskog foruma je javan i ostvaruje se na način utvrđen Zakonom i Statutom.
- (2) Članovi/ice Filantropskog foruma imaju pravo da budu redovno informirani o radu organa Filantropskog foruma.
- (3) Organi Filantropskog foruma dužni su članovima/icama Filantropskog foruma i ovlaštenim predstavnicima sredstava javnog informiranja učiniti dostupnim podatke, informacije i isprave koje se odnose na rad Filantropskog foruma.
- (4) Skupština svojim aktom može utvrditi da pojedini podaci, informacije i isprave predstavljaju poslovnu tajnu. Za poslovnu tajnu ne mogu se odrediti podaci koji su javni po Zakonu i drugim propisima, kao i podaci o kršenju zakona i drugih propisa.
- (5) Za ostvarivanje javnosti rada odgovoran je i nadležan Izvršni direktor.

### **Član 24.**

#### **(Pečat)**

- (1) Filantropski forum ima svoj pečat. Pečat je okruglog oblika prečnika 30 mm, po čijem je obodu kružno ispisan puni naziv Filantropskog foruma na tri službena jezika i dva pisma:

Udruženje Filantropski forum u Bosni i Hercegovini

Удружење Филантропски форум у Босни и Херцеговини

Udruga Filantropski forum u Bosni i Hercegovini,

a u sredini sjedište Sarajevo. Za čuvanje i upotrebu pečata odgovoran/na je Izvršni/a direktor/ica.

### **Član 25.**

#### **(Znak)**

- (1) Znak Filantropskog foruma je kružnog oblika a sastoji se od četiri elementa različitih boja: tamno plava, svijetlo plava, svijetlo ljubičasta i tamno ljubičasta, koji simboliziraju četiri stuba Filantropskog foruma. Prvi stub predstavlja predstavnike privatnog sektora, drugi predstavnike nevladinog sektora, treći individualne filantropce, a četvrti predstavlja tim Filantropskog foruma koji ih sve objedinjuje u jednu cjelinu. Svaki član preklapa se s drugim stvarajući tako jaku vezu. Ispod znakovnog dijela znaka, nalazi se natpis „Udruženje Filantropski forum“, napisan štampanim slovima, a ispod natpisa „Udruženje

Filantropski forum“ nalazi se natpis „Ujedinjujemo dobro“, napisan štampanim slovima, koji predstavlja slogan Filantropskog foruma. Natpisi „Udruženje Filantropski forum“ i „Ujedinjujemo dobro“ su svijetlo plave boje, a mogu se pojaviti u latiničnom i ćiriličnom pismu na tri službena jezika koji su u upotrebi u Bosni i Hercegovini te na engleskom jeziku. Natpisi „Udruženje Filantropski forum“ i „Ujedinjujemo dobro“ su neodvojivi dio znaka kao i svi njegovi ostali elementi.

## **Član 26.**

### **(Uslovi i postupak za spajanje, podjelu odnosno prestanak rada Udruženja)**

- (1) Filantropski forum može se spojiti ili podijeliti u drugo udruženje,
- (2) Spajanje je osnivanje novog udruženja na koje prelazi cjelokupna imovina tri ili više udruženja koja se spajaju. Spajanjem, udruženja prestaju da postoje, a na postupak upisa novonastalog udruženja primjenjuju se odredbe ovog zakona koje se odnose na osnivanje udruženja.
- (3) Udruženje se može podijeliti na dva ili više udruženja. Podijeljeno udruženje prestaje da postoji, a na postupak upisa novonastalih udruženja primjenjuju se odredbe ovog zakona koje se odnose na osnivanje udruženja.
- (4) Udruženje može osnovati svoje urede, predstavništva i podružnice u skladu sa odredbama statuta.
- (5) Filantropski forum se može spajati u:
  - a) savez udruženja koja djeluju na istom nivou, a bave se istim ili sličnim djelatnostima;
  - b) sa drugim udruženjima i nevladinim organizacijama koja djeluju na istom nivou i koje imaju iste ili slične ciljeve.
- (6) U slučaju spajanja, pripajanja, podjele ili transformacije Filantropskog foruma u drugi oblik, Skupština donosi odluku u kojoj će regulisati šta će sa imovinom Filantropskog foruma za slučaj nastanka navedenih promjena.
- (7) Odluku o spajanju, pripajanju, podjeli ili transformaciji donose punopravni/e članovi/ce Skupštine konsenzusom prisutnih članova/ica, ukoliko postoji kvorum, 50%+1 prisutnih članova.

## **Član 27.**

### **(Prestanak rada Foruma)**

(1) Filantropski forum može prestati sa radom:

- a) ako Filantropski forum ne postupi po rješenju iz člana 30. stav (2) Zakona, pokreće se postupak brisanja iz Registra, u skladu sa Zakonom;
- b) dobrovoljno, na osnovu odluke nadležnog organa Filantropskog foruma, koja odluka se donosi dvotrećinskom kvalifikovanom većinom glasova članova/ica. U slučaju dobrovoljnog prestanka rada registrovanog udruženja, Skupština Filantropskog foruma usvaja plan likvidacije koji je u skladu sa Statutom i Zakonom;
- c) ako punopravni/e članovi/ce Skupštine Filantropskog foruma donesu Odluku o prestanku rada ili odluku o spajanju i podjeli Filantropskog foruma;
- d) ako se utvrdi da je Filantropski forum prestao djelovati i to:
  - i. ako je proteklo dvostruko više vremena od vremena utvrđenog Statutom Filantropskog foruma za održavanje Skupštine Filantropskog foruma, a Skupština nije održana;
  - ii. ako se broj članova Filantropskog foruma spusti ispod broja tri, a Skupština Filantropskog foruma u roku od tri mjeseca od nastupanja ove okolnosti ne donese odluku o prijemu novih članova Filantropskog foruma.

Udruženje se briše iz registra kada rješenje o prestanku udruženja koje donese Ministarstvo postane konačno ili kada Sud Bosne i Hercegovine donese pravosnažnu presudu o zabrani rada udruženja.

Kada Ministarstvo utvrdi naprijed navedene činjenice, donosi rješenje o prestanku rada udruženja.

## **Član 28**

### **(Pravila za raspodjelu preostale imovine u slučaju prestanka rada Filantropskog foruma)**

(1) Nakon raspuštanja i prestanka s radom i izmirenja obaveza Filantropski forum, preostalu imovinu i sredstva podijelit će na način utvrđen statutom, drugom registrovanom udruženju ili fondaciji koja ima iste ili slične ciljeve i djelatnosti.

## **Član 29.**

### **(Izmjene i dopune Statuta)**

- (1) Kada se utvrdi da postoje opravdani razlozi, Upravni odbor Filantropskog foruma može podnijeti Skupštini zahtjev za donošenje novog Statuta ili izmjene i dopune postojećeg Statuta.
- (2) Prijedlog za izmjenu i dopunu Statuta može podnijeti:
  - a) član/ica Skupštine;
  - b) član/ica Upravnog odbora.
- (3) Prijedlog za izmjenu i dopunu Statuta se dostavlja Upravnom odboru na razmatranje i davanje mišljenja.
- (4) Prijedlog, zajedno sa svojim mišljenjem, Upravni odbor iznosi pred Skupštinu koja donosi konačnu odluku o ovom pitanju.
- (5) Izmjene i dopune Statuta stupaju na snagu danom izglasavanja od strane punopravnih članova/ica Skupštine konsenzusom prisutnih članova/ica Skupštine, ukoliko postoji kvorum za održavanje sjednice.

## **Član 30.**

### **(Prelazne i završne odredbe)**

- (1) Ovaj Statut stupa na snagu danom usvajanja.
- (2) Tumačenje ovog Statuta daje Skupština.

Broj: 02/21

Sarajevo, 02.11.2021.

Predsjednik Osnivačke skupštine

Zoran Puljić